



Jaguar I-PACE dilancar, harga bermula RM460,800

Oleh **Wartawan BH** - Mac 28, 2023 @ 3:20pm
bhbiz@nstp.com.my



Syed Ahmad Muzri bersama Jaguar I-PACE

PETALING JAYA: Jaguar Land Rover Malaysia hari ini melancarkan Jaguar I-PACE secara rasmi, kenderaan utiliti premium sport (SUV) elektrik pertama sepenuhnya dari Jaguar di pasaran kenderaan elektrik (EV) Malaysia.

Jaguar I-PACE, yang menyepadukan ciri-ciri praktikal dan kelestarian dalam reka bentuk kontemporari telah memenangi lebih daripada 80 anugerah di peringkat global, termasuk 'Kereta Terbaik Dunia', 'Reka Bentuk Kereta Terbaik Dunia' dan 'Kereta Hijau Dunia'.

Jaguar I-PACE serba baharu boleh didapati dalam dua pilihan, pada harga daripada RM460,800 bagi Hitam LE dan RM498,800 bagi HSE, dengan tempoh waranti

komprehensif selama lima tahun atau 150,000 kilometer, yang mana lebih awal, dan khidmat bantuan tepi jalan tiga tahun.

Ia juga termasuk servis percuma sehingga lima tahun atau 102,000 kilometer serta waranti Bateri EV sehingga lapan tahun atau 160,000 kilometer, yang mana lebih awal.

Jaguar Land Rover Malaysia juga memberikan kredit percuma RM1,000 dalam aplikasi DC GoToU bagi tempahan yang diterima dalam tempoh pelancaran sehingga 28 Mei 2023, yang membolehkan pengguna meninjau lokasi pengecasan dengan mudah sepanjang perjalanan.

Tempahan bagi SUV prestasi tinggi elektrik sepenuhnya ini boleh dibuat di bilik pameran Jaguar di Ara Damansara dan Pulau Pinang.

Pengarah Urusan Sime Darby Motors, Asia Tenggara, Hong Kong & Macau, Jeffrey Gan, berkata Sime Darby Motors berbesar hati untuk terus menyokong usaha Malaysia ke arah mencapai pengangkutan rendah karbon dengan meluaskan portfolio EV.

"Jaguar I-PACE menandakan satu mercu jaya baharu dalam perjalanan meneroka elektrifikasi Sime Darby Motors, sebagai sebahagian daripada strategi kami untuk merintis jalan bagi masa depan daya

pergerakan automotif dan mengukuhkan kedudukan kami sebagai pemimpin EV.

"Jaguar I-PACE adalah inovasi tersendiri dan kami yakin bahawa SUV premium bertaraf dunia ini akan mendapat sambutan yang memberangsangkan di pasaran seiring peralihan rakyat Malaysia kepada EV," katanya dalam satu kenyataan.

Pengarah Urusan Jaguar Land Rover Malaysia, Syed Ahmad Muzri Syed Faiz, berkata Jaguar I-PACE, yang sedia untuk memenuhi permintaan semakin bertambah bagi EV di Malaysia, adalah sebuah kenderaan serba maju yang mentakrifkan semula segmen SUV EV.

"Kuasa dan dinamikanya menjamin prestasi terulung dan kami menggalakkan pelanggan untuk mendaftar serta mencuba sendiri pengalaman pemanduan luar biasa kereta ini," katanya.

Dengan inisiatif kerajaan untuk menggalakkan penggunaan EV dan mencapai pengangkutan rendah karbon, rakyat Malaysia juga boleh mengambil kesempatan dengan memiliki Jaguar I-PACE pada harga yang lebih berpatutan menerusi konsesi bebas cukai kerajaan bagi EV CBU.

Melalui dua motor elektrik rekaan Jaguar pada setiap gandar yang menghasilkan prestasi gabungan luar biasa 400PS dan 696Nm, binaan aluminium dan pusat graviti yang rendah, seni bina I-PACE memberikan keseimbangan yang tiada tandingan, memperlihatkan prestasi pacuan semua roda, keanggunan, kemewahan dan ketangkasan.

Dicipta dari peringkat asas sebagai EV berprestasi tinggi, kepadatan tork tinggi dan ciri-ciri cekap guna tenaga kedua-dua motor menjanjikan prestasi kereta lumba yang dinamik.

Dilengkapi dengan bateri 90kWj, I-PACE mempunyai julat Prosedur Ujian Kenderaan Ringan Terselaras Sedunia (WLTP) yang diperakui sehingga 470 kilometer.

Pelanggan boleh menikmati kadar pengecasan yang jauh lebih pantas apabila disambungkan ke soket dinding 11kW, dengan julat WLTP 53km dicapai dalam sejam, dan kadar pengecasan dari sifar kepada penuh dalam masa 8.6 jam, sekali gus membolehkan kereta dicas semalaman di rumah.

Jaguar I-PACE ternyata mempunyai kelebihan tersendiri dalam segmennya, dengan keupayaan memecut dari sifar ke 100 km/j dalam masa 4.8 saat dan pecutan 400 meter dalam masa 12.4 saat, serta keupayaan mengharungi air sedalam 500 milimeter.

I-PACE sedia memberikan prestasi cemerlang, dengan pecutan linear yang sertamerta dan lancar, keselesaan perjalanan luar biasa dan dinamik pemanduan yang menarik menerusi suspensi udara.

Ruang dalam kenderaan yang luas dan bergaya mewujudkan keseimbangan paling sempurna antara kereta sport klasik Jaguar dan mutu ciptaan serba mewah.